

समे — 12:25

<><><><><><>

PM-Thailand

प्रधानमंत्री नरेन्द्र मोदी होर 6में बिम्सटेक शिखर सम्मेलन च हिस्सा लैने लेई अज्ज बैंकॉक पुज्जी गे न। 2016 ते 2019 दे बाद प्रधानमंत्री मोदी हुंदा थाईलैंड दा एह त्रीया दौरा होग। मोदी हुंदा अज्ज संजा'लै बैकांक च थाईलैंड दे प्रधानमंत्री पैतोंगतार्न शिनवात्रा हुंदे नै दपक्खी बैठक लाने दा कार्यक्रम ऐ। दवै नेता दौनें मुख्य बंशकार सरबंघे च होई दी प्रगति दी समीक्षा करगंन ते भारत थाईलैंड दपक्खी सांझ-भ्याली गी होर निगगर बनाने दे उपाएं पर सोच बचार करगंन। एह्दे अलावा दवै नेता क्षेत्रीय ते बहुपक्खी मुद्दें पर बी गल्लबात करगंन। इस दरान केई दपक्खी समझौते पर दस्तखत कीते जाने दी बी मेद ऐ। कल्लै थमां शुरू होआ'रदे बिम्सटेक शिखर सम्मेलन दा विषय सार ऐ "बिम्सटेक-समृद्ध लचीला ते मुक्त"। इस शिखर सम्मेलन च बैंकॉक विजन-2030 पर सैहमति बनाइयै इसी अपनाया जाग ते बिम्सटेक दे भविष्य दी दिशा तैह् करने लेई बिम्सटेक दे रसूरदार व्यक्तिएं दे समूह आस्सेआ तैआर रिपोर्ट दा बी समर्थन कीता जाग।

<><><><><><>

Jaishankar-Bimstes

विदेश मंत्री डॉ. एस. जयशंकर होरें अज्ज बिम्सटेक सदस्य देशें थमां आग्रह कीता जे ओह मजूदा वैश्विक बवस्था च यक्को-तरक्की ते अस्थिरता गी दिक्खदे होई संगठन दे प्रति मता महत्वाकांक्षी दृष्टिकोण अपनाएं। बैंकॉक, थाईलैंड में 20वीं बिम्सटेक मंत्रिस्तरीय बैठक गी संबोधित करदे होई डॉ. जयशंकर ने आखेआ जे नमीं बवस्था बुनियादी तौर पर मती क्षेत्रीय ते एजेंडा-अधारित ऐ। उनें सदस्यें गी आखेआ जे ओह अपनी ऊर्जा गी सारे कोला प्रमुख एकीकरणें जियां पावर ग्रिड कनेक्शनें, डिजिटल अवसंरचना, व्यावसायिक गतिविधियें, समुद्री ते भूमि परिवहन, ब्लू इकोनॉमी, ते स्वास्थ्य, खाद्य ते ऊर्जा सुरक्षा पर केंद्रित करन। उनें आखेआ जे भविष्य गी दिक्खदे होई, प्रौद्योगिकी, स्टार्ट-अप ते नवाचार अधिक महत्वपूर्ण भूमिका नभांगन। डॉ. जयशंकर ने पर्यटन गी बी इक होर संभावित क्षेत्र दे रूपै च प्रोत्साहित कीता ते इस गल्ल पर लोह पाई जे बिम्सटेक देशें च सारे कोला मती गिनतरी च पर्यटक औने आले लोकें च भारतीय न। उनें उंदे थमां साइबर सुरक्षा, आतंकवाद-रोधी, मानव तस्करी, अवैध मादक पदार्थें दे बपार ते होर सरबधत गतिविधियें गी गंभीरता कन्ने संबोधत करने ते उंदे थमां प्रभावी ढंग कन्ने निबडने लेई जरूरी रूपरेखा बनाने लेई बी आखेआ। विदेश मंत्री ने हाल गै च आए विनाशकारी भूचाल दे परैंत म्यांमार ते थाईलैंड दे प्रति इकजुटता ते समर्थन बी जाहर कीता।

<><><><><><>

Sakina-JKBOSE

सेहत ते मैडिकल शिक्षा मंत्री सकीना इत्तू होरें इक बैठक लाइयै जम्मू कश्मीर स्कूली शिक्षा बोर्ड दे कम्मकाज दा जायजा लैता। उनें केई सारे महत्वपूर्ण पैहलुएं पर चर्चा कीती जियां मतेयाने आली प्रक्रिया, पाठक्रम ते आईटी सरबंधी होर दुए हीलें। उनें बोर्ड दे ढांचे गी होर मजबूत करने पर जोर पाया ते प्रशासनिक सरिस्तें गी सुचारु ढंगै सिर शैक्षणिक गतिविधियां चलाने ते बोर्ड सरबंधी होर दुइयां गतिविधियां चलाने लेई आखेआ। उनें बोर्ड गी नमीं तकनीकें गी अपनाने लेई आखेआ। उनें 10मीं ते 12मीं जमात दे मतेसाने दे नतीजे इस म्हीने दे खीरै तगर घोषत करने लेई बी आखेआ। दिव्यांग ते खास जरूरतें आले बच्चे लेई बोर्ड दे पैहलुएं बारे गल्ल करदे होई मंत्री होरें इस भेठा बरोबर लागरुकता पर जोर पाया तां जे लोड़मंद लोक एह्दे थमां लाह ठोआई सकन।

<><><><><><>

Prasad IT

डद्योग ते बपार मंत्री जतिन प्रसाद होरें आखेआ जे जम्मू कश्मीर नै 2023-24 आले माली ब'रे च साफटवेयर, आईटी सरबंधी सेवाएं ते ऑटोमोबाइल सेक्टर च 42 करोड़ 12 लक्ख रुपे दा निर्यात कीता ऐ। आकाशवाणी जम्मू संवाददाता

नै जानकारी दित्ती जे संसद च प्रसाद होरें दस्सेआ जे एह आंकड़ा माली ब'रे 2023-24 दा ऐ। साफवेयर टेक्नालोजी पाकर्स ऑफ इंडिया लेई जम्मू कश्मीर नै 41 करोड़ 93 लख रुपे दा निर्यात कीता। इस रकम कन्नै इनफरमेशन टेक्नालोजी आले क्षेत्र च जम्मू कश्मीर दे योगदान दा पता लगदा ऐ, जिसलै कि मोटर गडिडएं सरबन्धी निर्यात ना दे बरोबर ऐ।

<><><><><><>

LHDCP-MVU

मच्छी ते पशु पालन सरबन्धी मंत्रालय दे केन्द्रीय राज्य मंत्री एस.पी.सिंह बगेल होरें कल संसद च जानकारी दित्ती जे जम्मू कश्मीर गी मवेशिएं दी सेहत ते बमारिएं दी रोकथाम सरबन्धी प्रोग्राम तैहत 50 मोबाइल वेटरीनरी यूनिट हासल होए न। आकाशवाणी जम्मू संवाददाता दी रिपोर्ट मूजब एह इकाइयां दूर दरेड़े इलाकें च रौहने आले करसानें गी जरूरी सेवा उपलब्ध करोआ'रदियां न। आंकड़े मूजब जम्मू कश्मीर च इसलै 50 एमवीयू चला'रदियां न। उनें दस्सेआ जे मुख्य भरै च 4 जहार 16 गश्ती इकाइयां न। उनें जानकारी दित्ती जे जम्मू कश्मीर गी इंदे लेई 13 करोड़ 33 लख रुपे दे फंड हासल करोआए गे न।

<><><><><><>

Project Clearence JK

जम्मू कश्मीर दे आर्थिक ते ढांचागत विकास गी बल देने लेई केई सारे विकास परियोजना चला'रदियां न। तकरीबन 3 सौ विकास परियोजना जेडियां मंजूरी गी बलगा'रदियां हियां, गी जंगलात मैहकमे थमां मंजूरी थोई गेई ऐ। इंदे च केई सारे महत्वपूर्ण शिड़क, पानी सप्लाई स्कीमां, सैलसफा, रक्षा कन्नै जुड़ी दियां न। 302 गी खीरी मंजूरी थोई गेई ऐ। जम्मू कश्मीर दे मंत्री जावेद अहमद राणा ते केन्द्रीय पर्यावरण मंत्री भूपेन्द्र यादव हुंदी अध्यक्षता च इस बारे बैठक लग्गी। राणा होरें आग्रह कीता जे बकाया 4 सौ मामलें गी तौले मंजूरी दित्ती जा। केन्द्रीय मंत्री होरें भरोसा दोआया जे प्रस्तावें गी तरजीह दी बिनाह पर मंजूरी दित्ती जाग।

<><><><><><>

DM-RTA

जम्मू दे जिला मैजिस्ट्रेट सचिन कुमार वैश्य होरें रिजनल ट्रांसपोर्ट अथार्टी दी बैठक लाई ते ट्रैफिक प्रबंधन ते सुरक्षत शिड़क यातायात लेई हिदायतां जारी कीतियां। उनें ग्रामीण इलाकें च बी ट्रैफिक प्रबंधन पर जोर पाया। उनें स्कूली शिक्षा मैहकमे ते ट्रैफिक पुलिस गी शिड़क सुरक्षा लेई जागरूकता अभियान चलाने लेई आखेआ।

<><><><><><>